

**Danmarkimi politiini pisartutut Kalaallit Nunaanni politiit  
nalunaaruteqartoqarneraniit qisuariarnissap tungaanut piffissamik atorneqartartumik  
nalunaarsuisalernissaat pillugu Naalakkersuisut danskit inatsisinik atortitsinermut  
ministerianut attaveqaqqullugit peqquneqarnissaannik Inatsisartut  
aalajangiiffigisassaattut siunnersuut.**

(Inatsisartuni ilaasortaq Justus Hansen, Demokraatit)

**Akissuteqaat**

(Pinngortitamut, Avatangiisinut Inatsisinillu Atuutsitsinermut Naalakkersuisoq)

**Siullermeerneqarnera**

Naalakkersuisut sinnerlugit Demokraatit sinnerlugit Inatsisartuni ilaasortaq Justus Hansen, aalajangiiffigisassatut siunnersuummik matumangga saqqummiussinera pillugu qutsavigerusuppara. Siunnersuut tunngavilersuullu taassuma tunuaniittoq, suliaasaqarfimmik tamatta pingaartitatsinnik, tassalu innuttaasut toqqissisimanissaannik sammisaqarnissamut tunngaviliimmat.

politiit nuna tamakkerlugu, tassalu illoqarfinni mikisuni angisuunilu aammalu nunaqarfinni innuttaasunut pitsaasumik toqqissisimanartumillu sullissinissaat Naalakkersuisut siunnersuuteqartutulli pingaartittorujussuaat.

Aalajangiiffigisassatut siunnersuut politiit piffissamut qisuariarnissamut atortagaannik nalunaarsuinissamut tunngasuvoq. Tassalu piffissaq politiit kalerrinneqarfianniit politiit pinerluffiusumut ajoquserfiusumulluunniit takkunnissaasa tungaanut atorneqartartoq. Siunnersuut malillugu Kalaallit Nunaanni Politiit pinartumik kalerrinneqarnerminni, piffissamik qisuariarnissamut atorneqartumik nalunaarsuisalernissamut peqquneqarnissaat siunertaralugu Naalakkersuisut Inatsisinik Atuutsitsinermut Ministereqarfimmut saaffiginnissapput.

Iisimatitsissutigisinnaavara, Naalakkersuisut siunnersuutip Inatsisartuni suliarineqarnissaa sioqqullugu danskit Inatsisinik Atuutsitsinermut Ministereqarfiannut saaffiginnissuteqareermata, Kalaallit Nunaanni Politiinut pinartumik kalerriisoqarnerani, piffissamik qisuariarnissamut atorneqartumik nalunaarsuisalernissamut piunaffigineqarnissaannik Inatsisinik Atuutsitsinermut Ministereqarfik pilersaaruteqarnerisooq apeqqutigalugu. Naalakkersuisut saaffiginnissutaat sulii akineqanngilaq.

Siunnersuutip inatsisartunut saqqummiunneqartup annertuumik taperserineqarnissaa neriutugalugu, Inatsisartut aalajangiiffigisassatut siunnersuummut, taamaalillunilu Naalakkersuisut suliami Inatsisinik Atuutsitsinermut Ministereqarfimmut saaffiginnissuteqarsimanerannut taperseeqqullugit Naalakkersuisut inassuteqarput.

Naalakkersuisunit taamatut oqaaseqarluta immikkoortoq Inatsisartunut suliaasangorlugu tunniupparput.